


PL

2551

Ka

1886

v.l



讀雪山房唐詩卷十四

凡例三
詩廿九

小傳四

目錄一

五律凡例

武進管世銘韞山氏著

昔人論五言律詩如聚四十賢人更著一屠酤不得解此自不敢苟于下筆

太宗明皇並工五言以至尊爲風雅倡王勃陳子昂沈佺期宋之問張說張九齡之徒比肩接迹莫不淵岳其心麟鳳其采稱盛代之元音焉

藍田日暖良玉生煙此最五言勝境也王摩詰殆篇篇不媿此意

孟浩然劉昫虛常建三君子臭味同源並清廟之遺音廣陵之絕調也襄陽名篇較廣遂與摩詰齊名劉常二君零圭斷

壁倍爲可寶

開寶詩人工爲五言古者無不工爲五言律各選所載殆無一篇不佳然古人亦惟作五古多作五律少此其所以能工也

太白五言律如聽鈞天廣樂心開目明如望海上仙山雲起水湧又或通篇不着對偶而興趣天然不可湊泊常尉孟山人時有之太白尤臻其妙不知者多纂入古詩反減其美今皆一一正之

孟襄陽伫興而就摩詰太白亦多得于自然嘉州間出奇峭究非倚以全力惟老杜苦學力思久而大適恢張變化律切渾成茲集所登殆當前後各家之半以學者取法莫備於是

也

少陵一生篤於倫誼夢中吾見弟書到汝爲人同氣之愛也
香霧雲鬟濕清輝玉臂寒伉儷之情也世亂憐渠小家貧仰
母慈父子之恩也已用當時法誰將此義陳一病緣明主三
年獨此心盡哀知有日爲客恐長休友朋之誼也至于愛君
憂國每飯不忘尤不可以枚舉其得於詩之本者厚矣故曰
詩聖

杜集洞房以下八章皆取篇首二字爲題蓋聯章也俯今仰
昔與有感傷春等作異曲同工俗選有止登洞房一首而遺
其下七章殊不可解又鸚鵡一篇係誤行編入不與前後諸章相首尾也
五言用虛字易弱獨工部江山有巴蜀棟宇自齊梁古牆猶

竹色虛閣自松聲轉從虛字出力七言用疊字近湊獨工部
無邊落木蕭蕭下不盡長江滾滾來江天漠漠鳥雙去風雨
時時龍一吟轉就疊字生色

大厯諸子實始爭工字句然雋不傷鍊巧不傷纖又通體仍
必雅令溫醑耐人吟諷不似元和以後但得一聯稱意便匆
匆不暇草書以致全無氣格也賈長江號爲苦吟而每篇必
有敗闕況其下乎

溫庭筠古戍落黃葉劉綺莊桂楫木蘭舟韋莊錦瑟怨遙夜
便覺開寶去人不遠可見文章雖限于時代豪傑之士終不
爲風氣所囿也李樊南集中沈着之作自命亦復不淺

閨閣之詩不能與士大夫爭勝以其學力終淺也獨李冶遠

水浮仙掉寒星伴使車比同時所稱劉長卿楚國蒼山古幽
州白日寒錢起破鏡催歸客殘陽見舊山郎士元荒城背流
水心雁入寒雲韓愈潮聲當晝起山翠近南深皇甫冉岸明
殘雪在潮滿夕陽多于良史風兼殘雪起河帶斷冰流等句
殆皆有過無不及中興高步若準周才之例吾必以作者與
焉

讀雪山房唐詩卷十四

詩人小傳 十二

馬

周

字賓王清河茌平人孤貧好學尤精詩傳初入關
舍中郎將常何家貞觀中代爲草疏何武人上怪
其能對以臣家客馬周爲之召見大悅授監察御
史數言事無不嘉納累遷中書令太宗嘗賜以飛
白書曰鸞鳳凌雲必資羽翼股肱之寄誠在忠良
集十卷今存詩一首

杜審言

字必簡襄陽人善五言詩工書翰少與李嶠崔融
蘇味道爲文章四友擢進士第爲隰城尉性矜誕
嘗語人曰吾文章合得屈宋作衙官吾之書跡合

言雪月星
得王羲之北面累轉洛陽丞坐事貶吉州司戶參
軍尋免歸武后召見令賦歡喜詩甚見嘉賞授著
作佐郎遷膳部員外郎神龍中坐交張易之兄弟
流峰州尋入爲國子監主簿修文館直學士卒有
文集十卷今鈔五律六首七律一首五排三首七

絕二首

蘇味道

趙州欒城人與里人李嶠俱以文翰顯時人謂之

蘇李弱冠擢進士第累轉咸陽尉裴行儉引管書

記延載中厯鳳閣舍人檢校侍郎證聖元年出爲

集州刺史俄召拜天官侍郎聖厯初厯鳳閣侍郎

同鳳閣鸞臺三品前後居相位數載多識臺閣故

事神龍時坐張易之黨貶眉州刺史還爲益州長
史卒集十五卷今鈔五律一首

王無競

字仲烈東萊人氣豪縱舉下筆成章科初授縣尉
累遷殿中御史預修三教珠英神龍初出爲蘇州
司馬後坐交張易之等再貶嶺南今鈔五律一首

姚崇

初名元崇又名元之陝州人貞觀中應下筆成章
舉授濮州司倉五遷夏官郎中時契丹擾河北軍
機填委元崇剖析若流則天奇之超遷夏官侍郎
尋同鳳閣鸞臺平章事中宗朝出爲刺史睿宗立
拜兵部尙書同中書門下進中書令後復貶刺史
先天中還爲尙書知政事遷紫微令開元中與盧

言雪山房集卷十四
懷慎源乾曜同居宰執崇獨當重任明於庶務斷
割不滯號稱名相尋薦宋璟自代以開府儀同三
司罷政仍五日一參入閣供奉集十卷今鈔五律

一首

蘇頲

字廷碩瓌之子幼敏悟一覽至千言輒覆誦擢進

士第調烏程尉舉賢良方正歷監察御史神龍中

遷給事中修文館學士中書舍人明皇愛其文由

工部侍郎進紫微侍郎知政事與李乂對掌書命

帝曰前世李嶠蘇味道文擅當時號蘇李今朕得

頲及乂何愧前人襲父封爵號小許公後罷爲益

州長史復入知吏部選事卒諡文憲頲以文章顯

與燕國公張說稱望略等世稱燕許集三十卷今
鈔五律一首七律四首五排三首五絕一首

趙驊

字雲卿鄧州穰人開元中舉進士連擢科第官至
秘書少監詩一首

賀知章

字季真會稽永興人少以文詞知名擢進士累遷
太常博士開元中張說爲麗正殿修書使奏請知
章入書院同撰六典及文纂後轉太常少卿遷禮
部侍郎加集賢院學士改授工部侍郎俄遷秘書
監知章性放曠晚尤縱誕自號四明狂客醉後屬
詞動成卷軸又善草隸人共傳寶天寶初請爲道
士還鄉里詔賜鏡湖剡川一曲御製詩以贈行皇

言部山房詩卷十四
太子已下咸就執別年八十六卒肅宗贈禮部尙書今鈔五律一首七絕三首

王灣

洛陽人登先天進士第開元初爲滎陽主簿馬懷素請校正羣籍召學涉之士分部譔次灣在選中秘書罷譔又與陸紹伯等同校麗正院長終洛陽尉灣詞翰早著其海日生殘夜江春入舊年之句當時稱最張說手題於政事堂每示能文令爲楷式今鈔五律一首五排一首

徐安貞

初名楚璧龍邱人應制舉一歲三登甲科開元中爲中書舍人集賢院學士帝屬文多令視草終中書侍郎與李林甫同用事天寶後避罪衡山岳寺

李邕識之因載北歸行至長沙謂其守曰瀟湘逢
故人若幽谷之覩太陽不然委填巖穴矣今鈔五
律一首

萬齊融

越州人官崑山令今鈔五律一首

張子容

先天二年擢進士第爲樂城尉與孟浩然友善今

鈔五律三首七絕一首

張均

說長子開元中厯官大理卿受祿山僞命爲中書

令肅宗立免死長流合浦集二十卷今鈔五律一

首七絕一首

胡皓

開元中人張孝嵩出塞皓與張九齡韓休崔沔王

翰賀知章撰送行詩號朝英集今鈔五律一首

王 諲

登開元進士第官右補闕今鈔五律二首

沈 頌

無錫尉今鈔五律一首

芮挺章

國子進士天寶三年編國秀集今鈔五律一首

讀雪山房唐詩卷十四

五律目錄一

太宗一首

元宗三首

王績一首

馬周一首

李嶠四首

王勃二首

盧照鄰一首

駱賓王二首

陳子昂六首

張九齡八首

楊炯三首

杜審言六首

蘇味道一首

丁仙芝一首

沈佺期九首

宋之問六首

王無競一首

郭元振一首

姚崇一首

張說九首

蘇頲一首

孫逖四首

趙驊一首

賀知章一首

王灣一首

徐安貞一首

萬齊融一首

崔國輔二首

盧象一首

裴迪一首

崔顥五首

張子容三首

張均一首

祖詠八首

胡皓一首

王維四十首

孟浩然卅三首

劉脊虛二首

常建五首

李頎五首

王昌齡五首

邱爲一首

王諲二首

綦毋潛二首

儲光羲三首

沈頌一首

蔣冽一首

崔曙三首

張謂四首

芮挺章一首

讀雪山房唐詩卷十四

五律一

秋日

太宗

爽氣澄蘭沼秋風動桂林露凝千片玉菊散一叢金日岫高
低影雲空點綴陰蓬瀛不可到泉石且娛心


經鄒魯祭孔子而歎之

元宗

夫子何爲者棲棲一代中地猶鄒氏邑宅卽魯王宮歎鳳嗟
身否傷麟怨道窮今看兩楹奠當與夢時同

送賀知章歸四明

遺榮期入道辭老竟抽簪豈不惜賢達其如高尚心囊中得
秘要方外散幽襟獨有青門餞羣僚悵別深



幸蜀西至劔門

劔閣橫雲峻鑾輿出狩迴翠屏千仞合丹嶂五丁開灌木縈
旗轉仙雲拂馬來乘時方在德嗟爾勒銘才

野望

王績

東皋薄暮望徙倚欲何依樹樹皆秋色山山唯落暉牧人驅
犢返獵馬帶禽歸相顧無相識長歌懷采薇

凌朝浮江旅思

馬周

太清上初日春水送孤舟山遠疑無樹潮平似不流岸花開
且落江鳥沒還浮羈望傷千里長歌遣四愁

侍宴長甯公主東莊應制

李嶠

別業臨青甸鳴鑾降紫霄長筵鵷鷺集仙管鳳凰調樹接南

山近煙含北渚遙承恩咸已醉戀賞未還鑣

奉和驪山高頂寓目應制

步輦陟山巔山高入紫煙忠臣還捧日聖后欲捫天迴識平陵樹低看華嶽蓮帝鄉應不遠空見白雲懸

馬武騎挽歌二首

五日皆休沐三泉獨不歸池臺金闕是尊酒玳筵非巷靜游禽入門閑過客稀惟餘昔年鳳尚繞故樓飛昔下天津館嘗過帝子家夜傾金屋酒春舞玉臺花試馬依紅埒吹簫弄紫霞誰言東郭路翻枉北門車

聖泉宴

王勃

披襟乘石磴列籍俯春泉蘭氣薰山酌松聲韻野絃影飄垂

言事山房唐詩卷十四
二
葉外香度落花前興洽林塘晚重巖起夕煙

杜少府之任蜀川

城闕輔三秦風煙望五津與君離別意同是宦游人海內存
知己天涯若比鄰無爲在岐路兒女共沾巾

文翁講堂

盧照鄰

錦里淹中館岷山稷下亭空梁無燕雀古壁有丹青槐落猶
疑市苔深不辨銘良哉二千石江漢表遺靈

在獄詠蟬

駱賓王

西陸蟬聲唱南冠客思侵那堪元鬢影來對白頭吟露重飛
難進風多響易沈無人信高潔誰爲表予心

樂大夫挽詞

五首
之一

一旦先朝菌千秋掩夜臺青鳥新兆去白馬故人來草露當
春泣松風向夕哀甯知荒隴外弔鶴自徘徊

晚次樂鄉縣

陳子昂

故鄉杳無際日暮且孤征川原迷舊國道路入邊城野戍荒
煙斷深山古木平如何此時恨噉噉夜猿鳴

送魏大從軍

匈奴猶未滅魏絳復從戎悵別三河道言追六郡雄雁山橫
代北狐塞接雲中勿使燕然上唯畱漢將功

送客

故人洞庭去楊柳春風生相送河洲晚蒼茫別思盈白蘋已
堪把綠芷復含榮江南多桂樹歸客贈生平

春夜別友人

二首之一

銀燭吐青煙金樽對綺筵
離堂思琴瑟別路繞山川
明月隱高樹長河沒曉天
悠悠洛陽去此會在何年

送別崔著作東征

金天方肅殺白露始專征
海氣侵南郡邊風掃北平
王師非樂戰之子慎佳兵
莫賣盧龍塞歸邀麟閣名

春日登金華觀

白玉仙臺古丹邱別望遙
山川亂雲日樓榭入煙霄
鶴舞千秋樹虹飛百尺橋
還疑赤松子天路坐相邀

和姚令公從幸溫泉喜雪

張九齡

萬乘飛黃馬千金狐白裘
正逢銀霰積如向玉京遊
瑞色鋪

馳道花文拂綵旒還聞吉甫頌不共郢歌儔

在洪州答綦母學士

旬雨不愆期由來自若時爾無言郡政吾豈欲天欺常念涓
塵益惟歡草樹滋課成非所擬人望在東菑

湖口望廬山瀑布泉

萬丈紅泉落迢迢半紫氛奔飛下雜樹灑落出重雲日照虹
蜺似天清風雨聞靈山多秀色空水共氤氲

旅宿淮陽亭口號

日暮荒亭上悠悠旅思多故鄉臨桂水今夜渺星河暗草霜
華發空庭雁影過興來誰與晤勞者自爲歌

望月懷遠

言山房詩卷十四
海上生明月天涯共此時
情人怨遙夜竟夕起相思
滅燭憐光滿披衣覺露滋
不堪盈手贈還寢夢佳期

秋夕望月

清迥江城月流光萬里同
所思如夢裡相望在庭中
皎潔青苔露蕭條黃葉風
含情不得語頻使桂華空

詠燕

海燕何微渺乘春亦暫來
豈知泥滓賤祇見玉堂開
繡戶時雙入華軒日幾回
無心與物競鷹隼莫相猜

眉州康司馬挽歌詞

家受專門學人稱入室賢
劉楨徒有氣管輅獨無年
謫去長沙國魂歸京兆阡
從茲匣中劍埋沒罷沖天

從軍行

楊炯

烽火照西京，心中自不平。
牙璋辭鳳闕，鐵騎繞龍城。
雪暗凋旗畫，風多雜鼓聲。
甯爲百夫長，勝作一書生。

出塞

塞外欲紛紜，雌雄猶未分。
明堂占氣色，華蓋辨星文。
二月河魁將，三千太乙軍。
丈夫皆有志，會見立功勳。

紫騮馬

俠客重周游，金鞭控紫騮。
蛇弓白羽箭，鶴轡赤茸鞦。
發跡來南國，長鳴向北州。
匈奴猶未滅，畫地取封侯。

蓬萊三殿侍宴奉敕詠終南山

杜審言

北斗挂城邊，南山倚殿前。
雲標金闕迥，樹杪玉堂懸。
半嶺通

讀書山房唐詩卷十四
佳氣中峰繞瑞煙小臣持獻壽長此戴堯天
五

和晉陵陸丞早春遊望

獨有宦游人偏驚物候新雲霞出海曙梅柳渡江春
淑氣催黃鳥晴光轉綠蘋忽聞歌古調歸思欲沾巾

秋夜宴臨津鄭明府宅

行止皆無地招尋獨有君酒中堪累月身外卽浮雲
露白宵鐘徹風清曉漏聞坐攜餘興往還似未離羣

登襄陽城

旅客三秋至層城四面開楚山橫地出漢水接天迴
冠蓋非新里章華卽舊臺習池風景異歸路滿塵埃

夏日過鄭七山齋

共有樽中好言尋谷口來
薜蘿山徑入荷芰水亭開
日氣收殘雨雲陰送晚雷
洛陽鐘鼓至車馬繫遲回

賦得妾薄命

草綠長門掩苔青永巷幽
寵移新愛奪淚落故情留
啼鳥驚殘夢飛花攬獨愁
自憐春色罷團扇復迎秋

正月十五夜

蘇味道

火樹銀花合星橋鐵鎖開
暗塵隨馬去明月逐人來
游妓皆穠李行歌盡落梅
金吾不禁夜玉漏莫相催

渡楊子江

丁仙芝

桂楫中流望空波兩岸明
林開揚子驛山出潤州城
海盡邊陰靜江寒朔吹生
更聞風葉下淅瀝度秋聲

送金城公主西蕃應制

沈佺期

金榜扶丹掖銀河屬紫闈
那堪將鳳女還以嫁烏孫
王就歌中怨珠辭掌上恩
西戎非我匹明主至公存

幸白鹿觀應制

紫鳳真人府斑龍太上家
天流芝蓋下山轉桂旗斜
聖藻垂寒露仙杯落晚霞
惟應問王母桃作幾時花

銅雀臺

昔年分鼎地今日望陵臺
一旦雄圖盡千秋遺令開
綺羅君不見歌舞妾空來
恩共漳河水東流無重回

巫山高

巫山高不極合沓狀奇新
暗谷疑風雨陰崖若鬼神
月明三

峽曙潮滿九江春爲問陽臺客應知入夢人

折楊柳

玉窗朝日映羅帳春風吹拭淚攀楊柳長條踈地垂白花飛
歷亂黃鳥思參差妾自肝腸斷傍人那得知

被試出塞

十年通大漠萬里出長平寒日生戈劍陰雲拂旆旌
舊壘疲馬戀空城辛苦皋蘭北胡塵損漢兵

雜詩

聞道黃龍戍頻年不解兵可憐閨裡月長在漢家營
少婦今春意良人昨夜情誰能將旗鼓一爲取龍城

嶽館

讀雪山房唐詩卷十四
洞壑仙人館孤峰玉女臺空濛朝氣合窈窕夕陽開流澗含
輕雨虛巖應薄雷正逢鸞與鶴歌舞出天來

夜宿七盤嶺

獨遊千里外高臥七盤西山月臨牀近天河入戶低芳春平
仲綠清夜子規啼浮客空畱聽衰城聞曙雞

春日芙蓉園侍宴應制

宋之問

芙蓉秦地沼盧橘漢家園谷轉斜盤徑川迴曲抱源風來花
自舞春入鳥能言侍宴瑤池夕歸途騎吹繁

夏日仙萼亭應制

高嶺逼星河乘輿此日過野含時雨潤山雜夏雲多睿藻光
巖穴宸襟洽薜蘿悠然小天下歸路滿笙歌

扈從登封途中作

帳殿鬱崔嵬仙游實壯哉曉雲連幕捲夜火雜星回谷暗千
旗出山鳴萬乘來扈從良可賦終乏揆天才

途中寒食題黃梅臨江驛寄崔融

馬上逢寒食愁中屬暮春可憐江浦望不見洛陽人北極懷
明主南溟作逐臣故園腸斷處日夜柳條新

題大庾嶺北驛

陽月南飛雁傳聞至此迴我行殊未已何日復歸來江靜潮
初落林昏瘴不開明朝望鄉處應見隴頭梅

度大庾嶺

度嶺方辭國停輶一望家魂隨南翥鳥淚盡北枝花山雨初

讀雪山房唐詩卷十四
八
含霽江雲欲變霞但令歸有日不敢怨長沙

巫山高

王無兢

神女向高唐巫山下夕陽徘徊行作雨婉孌逐荆王電影江
前落雷聲峽外長朝雲無處所臺館曉蒼蒼

塞上

郭元振

塞外虜塵飛頻年出武威死生隨玉劒辛苦向金微久戍人
將老長征馬不肥仍聞酒泉郡已合數重圍

夜渡江

姚崇

夜渚帶浮煙蒼茫晦遠天舟輕不覺動纜急始知牽聽草遙
尋岸聞香暗識蓮惟看孤帆影常似客心懸

奉和聖製登驪山矚眺應制

張說

寒山上半空臨眺盡寰中是日巡遊處晴光遠近同川明分
渭水樹暗辨新豐巖壑清音暮天歌起大風

奉和聖製過甯王宅應制

進酒忘憂館簫韶喜降臨帝堯敦族禮王季友兄心竹院龍
鳴笛梧宮鳳繞林大風將小雅一字盡千金

恩制賜食於麗正殿書院宴賦得林字

東壁圖書府西園翰墨林誦詩聞國政講易見天心位竊和
羹重恩叨醉酒深載歌春興曲情竭爲知音

幽州夜飲

涼風吹夜雨蕭瑟動寒林正有高堂宴能忘遲暮心軍中宜
舞劒塞上重笳音不作邊城將誰知恩遇深

嶺南送使

秋雁逢春返流人何日歸將余去國淚灑子入鄉衣饑狄啼
相聚悲猿喘更飛南中不可問書此示京畿

岳州贈廣平公宋大夫

亞相本時英歸來復國楨朝推長孺直野慕隱之清傳節還
閩嶂皇華入漢京甯思江上老歲晏獨無成

還至端州驛前與高六別處

舊館分江日悽然望落暉相逢傳旅食臨別換征衣昔記山
川是今傷人代非往來皆此路生死不同歸

四月一日過江赴荊州

春色沅州盡三年客始回夏雲隨北帆同日過江來水漫荆

門出山平郢路開
比肩羊叔子千載豈無才

深渡驛

旅宿青山夜荒庭白露秋
洞房懸月影高枕聽江流
猿響寒巖樹螢飛古驛樓
他鄉對搖落併覺起離憂

奉和聖製登驪山高頂寓目應制

蘇頌

仙蹕御層氛高高積翠分
巖聲中谷應天語半空聞
豐樹連黃葉函關入紫雲
聖圖恢寓縣歌賦小橫汾

宿雲門寺閣

孫逖

香閣東山下煙花象外幽
懸燈千嶂夕捲幔五湖秋
畫壁餘鴻雁紗窗宿斗牛
更疑天路近夢與白雲遊

送韋十五侍御使蜀

言雪月房言卷十四
天使出霜臺行人擇吏才傳車春色送離興夕陽催驛繞巴
江轉關迎劒道開西南一何幸前後二龍來

送趙評事攝御史監軍嶺南

議獄持邦典臨戎假憲威風從閭闔去霜入洞庭飛篁竹迎
金鼓樓船引繡衣明年拜眞月南斗使星歸

張丞相燕公挽歌詞

二首
之一

海內文章伯朝端禮樂英一言興寶運三入濟羣生命與才
相偶年將位不并台星忽已圻流慟軫皇情

送晁補闕歸日本

趙驊

西掖承休澣東隅返故林來稱郟子國歸是越人吟馬上秋
郊遠舟中曙海陰知君懷魏闕萬里獨遙心

送人之軍中

賀知章

常經絕脈塞復見斷腸流
送子成今別令人起昔愁
隴雲晴半雨邊草夏先秋
萬里長城寄無貽漢國憂

次北固山下

王灣

客路青山外行舟綠水前
潮平兩岸闊風正一帆懸
海日生殘夜江春入舊年
鄉書何處達歸雁洛陽邊

送丹陽採訪

徐安貞

郡縣分南國皇華出聖朝
爲憐鄉擢近不道使車遙
舊俗吳三讓遺風漢六條
願言除疾苦天子聽歌謠

贈別江頭

萬齊融

東南飛鳥處言是故鄉天
江上風花暖君行定幾千
計程頻

破月數別屢開年明歲潯陽水相思寄采蓮

宿法華寺

崔國輔

松雨時復滴寺門清且涼此心竟誰證回憩支公牀壁畫感靈蹟龕經傳異香獨遊寄象外忽忽歸南昌

林園秋夜作

林臥避殘暑白雲長在天賞心既如此對酒非徒然月色徧秋露竹聲兼夜泉涼風懷袖裡茲意與誰傳

雜詩

二首之一

盧象

家居五原上征戰是平生獨負山西勇誰當塞上名死生遼海戰雨雪薊門行諸將封侯盡論功獨不成

西塔寺陸羽茶泉

羽在大愿後
疑非迪詩

裴迪

竟陵西塔寺踪跡尙空虛不獨公住住曾經陸羽居草堂荒
產蛤茶井冷生魚一汲清冷水高風味有餘

贈梁州張都督

崔顥

聞君爲漢將虜騎罷南侵出塞清沙漠還家拜羽林風霜臣
節苦歲月主恩深爲語西河使知予報國心

送單于裴都護赴西河

征馬出翩翩城秋月正圓單于莫近塞都護欲臨邊漢驛通
煙火胡沙乏井泉功成須獻捷未必去經年

題沈隱侯八詠樓

梁日東陽守爲樓望越中綠窗明月在青史古人空江靜聞
山狹川長數塞鴻登臨白雲晚流恨此遺風

古意

十五嫁王昌盈盈入畫堂
自矜年最少復倚墻爲郎舞
愛前溪綠歌憐子夜長
閒來鬪百草度日不成粧

長門怨

君王寵初歇棄妾長門宮
紫殿青苔滿高樓明月空
夜愁生枕席春意罷簾櫳
泣盡無人問容華落鏡中

送孟浩然歸襄陽

張子容

東越相逢地西亭送別津
風濤看解纜雲海去愁人
鄉在桃花岸山連楓樹春
因懷故園意歸與孟家鄰

永嘉作

拙宦從江左投荒更海邊
山將孤嶼遠水共惡溪連
地濕梅

多雨潭蒸竹起煙未應悲白髮炎瘴苦華年

永嘉卽事寄贛縣袁少府

山繞樓臺出谿通里閤斜曾爲謝客郡多有逐臣家海氣朝
成雨江天晚作霞題書報賈誼卑濕似長沙

岳陽晚眺

張均

晚景寒鴉集秋風旅雁歸水光浮日去霞彩映江飛洲白蘆
花吐園红柿葉稀長沙卑濕地九月未成衣

答王維畱宿

祖詠

四年不相見相見復何爲握手言未畢卻令傷別離升堂還
駐馬酌醴便呼兒語默自相對安用傍人知

長樂驛畱別盧象裴總

言上房詩卷一四
三
朝來已握手宿別更傷心
灞水行人渡商山驛路深
故情君且足謫宦我難任
直道皆如此誰能淚滿襟

蘇氏別業

別業居幽處到來生隱心
南山當戶牖澧水映園林
竹覆經冬雪庭昏未夕陰
寥寥人境外閒坐聽春禽

宿陳畱李少府揆廳

相知有叔卿訟簡夜彌清
旅泊倦愁臥堂空聞曙更
風簾搖燭影秋雨帶蟲聲
歸思那堪說悠悠限洛城

題韓少府水亭

梅福幽棲處佳期不忘還
鳥啼當戶竹花繞傍池
山水氣侵階冷藤陰覆座
閒甯知武陵趣宛在市朝間

題遠公經臺

蘭若無人到真僧出復稀
苔侵行道席雲濕坐禪衣
澗鼠緣香案山蟬噪竹扉
世間長不見甯止暫忘歸

江南旅情

楚山不可極歸路但蕭條
海色晴看雨江聲夜聽潮
劍畱南斗近書寄北風遙
爲報空潭橘無媒贈洛橋

泊揚子津

纔入維揚郡鄉關此路遙
林藏初過雨風退欲歸潮
江火明沙岸雲帆礙浦橋
客衣今日薄寒氣近來饒

同蔡孚起居詠鸚鵡

胡皓

鸚鵡殊姿致鸞皇得比肩
常尋金殿裡每話玉階前
賈誼才

詩雪山房唐詩卷十四
古
方達揚雄老未遷能言既有地何惜爲聞天

從岐王過楊氏別業應教

王維

揚子談經處淮王載酒過興闌啼鳥換坐久落花多逕轉迴
銀燭林開散玉珂嚴城時未啓前路擁笙歌

同崔員外秋宵寓直

建禮高秋夜承明候曉過九門寒漏徹萬井曙鐘多月迥藏
珠斗雲消出絳河更慙衰朽質南陌共鳴珂

輞川閒居贈裴秀才迪

寒山轉蒼翠秋水日潺湲倚杖柴門外臨風聽暮蟬渡頭餘
落日墟里上孤煙復值接輿醉狂歌五柳前

寄荊州張丞相

所思竟何在悵望深荆門舉世無相識終身思舊恩方將與
農圃藝植老邱園目盡南無雁何由寄一言

冬晚對雪憶胡居士家

寒更傳晚箭清鏡覽衰顏隔牖風驚竹開門雪滿山灑空深
巷靜積素廣庭閒借問袁安舍翛然尙閉關

酬比部楊員外率爾見贈之作

一作盧照鄰詩

舊簡拂塵看鳴琴候月彈桃花迷漢姓松樹有秦官空谷歸
人少青山背日寒羨君棲隱處遙望白雲端

酬張少府

晚年惟好靜萬事不關心自願無長策空知返舊林松風吹
解帶山月照彈琴君問窮通理漁歌入浦深

言言山房詩卷十四
三
送邱爲落第歸江東

憐君不得意況復柳條春爲客黃金盡還家白髮新五湖三畝宅萬里一歸人知爾不能薦羞稱獻納臣

送嚴秀才還蜀

甯親爲令子似舅卽賢甥別路經花縣還鄉入錦城山臨青塞斷江向白雲平獻賦何時至明君憶長卿

送崔九宗興遊蜀

送君從此去轉覺故人稀徒御猶回首田園方掩扉出門當旅食中路授寒衣江漢風流地游人何歲歸

送平澹然判官

不識陽關路新從定遠侯黃雲斷春色畫角起邊愁瀚海經

年到交河出塞流須令外國使知飲月氏頭

送劉司直赴安西

絕域陽關道胡沙與塞塵三春時有雁萬里少行人
苜蓿隨天馬葡萄逐漢臣當令外國使不敢覓和親

送趙都督赴代州得青字

天官動將星漢地柳條青萬里鳴刁斗三軍出井陘
忘身辭鳳闕報國取龍庭豈學書生輩窗間老一經

送方城韋明府

遙思葭菼際寥落楚人行高鳥長淮水平蕪故郢城
使車聽雉乳縣鼓應雞鳴若見州從事無嫌手板迎

送梓州李使君

萬壑樹參天
千山響杜鵑
山中一夜雨
樹杪百重泉
漢女輸檀布
巴人訟芋田
文翁翻教授
不敢倚先賢

送楊長史赴果州

裋斜不容嚙
之子去何之
鳥道一千里
猿聲十二時
官橋祭酒客
山木女郎祠
別路同明月
君應聽子規

送邢桂州

鏡吹喧京口
風波下洞庭
赭圻將赤岸
擊汰復揚舲
日落江湖白
潮來天地青
明珠歸合浦
應逐使臣星

送孟六歸襄陽

一作張子容詩

杜門不復出
久與世情疏
以此爲長策
勸君歸舊廬
醉歌田舍酒
笑讀古人書
好是一生事
無勞獻子虛

初出濟州別城中故人

微官易得罪謫去濟州陰執政方持法明君無此心閭閻河
潤上井邑海雲深縱有歸來日多愁年鬢侵

登裴秀才廸小臺

端居不出戶滿目望雲山落日鳥邊下秋原人外閑遙知遠
林際不見此簷間好客多乘月應門莫上關

崔錄事

解印歸田里賢哉此丈夫少年曾任俠晚節更爲儒遯迹東
山下因家滄海隅已聞能狎鳥余欲共乘桴

成文學

寶劍千金裝登君白玉堂身爲平原客家有邯鄲倡使氣公

卿座論心游俠場中年不得意謝病客遊梁

過香積寺

一作王昌齡詩

不知香積寺數里入雲峰古木無人逕深山何處鐘泉聲咽
危石日色冷青松薄暮空潭曲安禪制毒龍

登辨覺寺

竹徑從初地蓮峰出化城窗中三楚盡林外九江平嫩草承
趺坐長松響梵聲空居法雲外觀世得無生

喜祖三至畱宿

門前洛陽客下馬拂征衣不枉故人駕平生多掩扉行人返
深巷積雪帶餘暉早歲同袍者高車何處歸

晚春嚴少尹與諸公見過

松菊荒三徑圖書共五車烹葵邀上客看竹到貧家鵲乳先
春草鶯啼過落花自憐黃髮暮一倍惜年華

鄭果州相過

麗日照殘春初晴草木新牀前磨鏡客樹下灌園人五馬驚
窮老雙童逐老身中廚辦麤食當恕阮家貧

山居秋暝

空山新雨後天氣晚來秋明月松間照清泉石上流竹喧歸
浣女蓮動下漁舟隨意春芳歇王孫自可留

終南別業

中歲頗好道晚家南山陲興來每獨往勝事空自知行到水
窮處坐看雲起時偶然值鄰叟談笑無還期

歸嵩山作

清川帶長薄車馬去閑閑流水如有意暮禽相與還荒城臨古渡落日滿秋山迢遞嵩高下歸來且閉關

韋給事山居

幽尋得此地詎有一人曾大壑隨階轉羣山入戶登庖廚出深竹印綬隔垂藤卽事辭軒冕誰云病未能

山居卽事

寂寞掩柴扉蒼茫對落暉鶴巢松樹遍人訪華門稀綠竹含新粉紅蓮落故衣渡頭燈火起處處采菱歸

終南山

太乙近天都連山到海隅白雲迴望合青靄入看無分野中

峰變陰晴眾壑殊欲尋人處宿隔水問樵夫

觀獵

風勁角弓鳴將軍獵渭城草枯鷹眼疾雪盡馬蹄輕忽過新
豐市還歸細柳營迴看射鵰處千里暮雲平

春日上方卽事

好讀高僧傳時看辟穀方鳩形將削杖龜殼用支牀柳色春
山映梨花夕鳥藏北窗桃李下閒坐但聞香

漢江臨泛

楚塞三湘接荆門九派通江流天地外山色有無中郡邑浮
前浦波瀾動遠空襄陽好風日畱醉與山翁

汎前陂

言雪山房詩卷十四
秋空自明迥況復遠人間暢以沙際鶴兼之雲外山澄波澹
將夕清月皓方閒此夜任孤棹夷猶殊未還

使至塞上

單車欲問邊屬國過居延征蓬出漢塞歸雁入胡天大漠孤
煙直長河落日圓蕭關逢候吏都護在燕然

待儲光羲不至

重門朝已啓起坐聽車聲要欲聞清佩方將出戶迎曉鐘鳴
上苑疏雨過春城了自不相顧臨堂空復情

故西河杜太守挽歌

三首
之一

返葬金符守同歸石窹妻卷衣悲畫翟持髮待鳴雞容衛都
人慘山川駟馬嘶猶聞隴上客相對哭征西

望洞庭湖贈張丞相

孟浩然

八月湖水平涵虛混太清氣蒸雲夢澤波撼岳陽城欲濟無
舟楫端居恥聖明坐觀垂釣者徒有羨魚情

九日龍沙作寄劉大眷虛

龍沙豫章北九日掛帆過風俗因時見湖山發興多客中誰
送酒棹裡自成歌歌竟乘流去滔滔任夕波

宿桐廬江寄廣陵舊遊

山暝聽猿愁滄江急夜流風鳴兩岸葉月照一孤舟建德非
吾土維揚憶舊遊還將兩行淚遙寄海西頭

九日懷襄陽

去國似如昨倏焉經杪秋峴山望不見風景令人愁誰採籬

下菊應閑池上樓宜城多美酒歸與葛疆遊

初出關旅亭夜坐懷王大校書

向夕槐煙起蔥蘢池館曛客中無偶坐關外惜離羣燭至螢
光滅荷枯雨滴聞永懷芸閣友寂塞滯揚雲

早寒江上有懷

木落雁南度北風江上寒我家襄水曲遙隔楚雲端鄉淚客
中盡孤帆天際看迷津欲有問平海夕漫漫

畱別王侍御維

寂寂竟何待朝朝空自歸欲尋芳草去惜與故人違當路誰
相假知音世所稀祇應守寂寞還掩故園扉

洛中送奚三還揚州

水國無邊際舟行共使風羨君從此處朝夕見鄉中予亦離
家久南歸恨不同音書若有問江上會相逢

送謝錄事之越

清旦江天迥涼風西北吹白雲向吳會征帆亦相隨想到耶
溪日應探禹穴奇仙書倘相示予在北山陲

送元公之鄂渚尋觀主張驂鸞

桃花春水漲之子忽乘流峴首離蛟浦江中問鶴樓贈君青
竹杖送爾白蘋洲應自神仙子相期汗漫游

京還別新豐諸友

吾道昧所適驅車還向東主人開舊館畱客醉春風樹繞溫
泉綠塵遮曉日紅拂衣從此去高步躡華嵩

言雪山房集卷十四
三
都下送辛大之鄂

南國辛居士言歸舊竹林未逢調鼎用徒有濟川心予亦忘
機者田園在漢陰因君故鄉去遙寄式微吟

廣陵別薛八

士有不得志棲棲吳楚間廣陵相遇罷彭蠡泛舟還檣出江
中樹波連海上山風帆明日遠何處更追攀

清明宴梅道士房

林臥愁春盡開軒覽物華忽逢青鳥使邀我赤松家丹竈初
開火仙桃正落花童顏若可駐何惜醉流霞

與諸子登峴山

人事有代謝往來成古今江山畱勝迹我輩復登臨水落漁

梁淺天寒夢澤深羊公碑尙在讀罷淚沾巾

尋天台山

吾愛太乙子餐霞臥赤城欲尋華頂去不憚惡溪名歇馬憑
雲宿揚帆截海行高高翠微裡遙見石渠橫

晚泊潯陽望廬山

挂席幾千里名山都未逢泊舟潯陽郭喜見香爐峰嘗讀遠
公傳永懷塵外蹤東林精舍近日暮但聞鐘

萬山潭作

垂釣坐盤石水清心亦閒魚行潭樹下猿掛島藤間游女昔
解佩傳聞於此山求之不可得沿月棹歌還

陪李侍御渡松滋江

南紀西江闊皇華御史雄截流甯假楫挂席自生風寮案爭
攀鵜魚龍亦避驄坐聽白雪唱翻入棹歌中

梅道士水亭

傲吏非凡吏名流卽道流隱居不可見高論莫能酬水接仙
源近山藏鬼谷幽再來迷處所花下問漁舟

游精思觀回王白雲在後

出谷未亭午至家日已曛回瞻山下路但見牛羊羣樵子暗
相失草蟲寒不聞衡門猶未掩伫立望夫君

尋梅道士

彭澤先生柳山陰道士驚我來從此好停策夏雲多重以觀
魚樂因之鼓枻歌崔徐迹未朽千載揖清波

裴司士員司戶見尋

府僚能枉駕家醞復新開
落日池上酌清風松下來
廚人具雞黍稚子摘楊梅
誰道山公醉猶能騎馬回

過故人莊

故人具雞黍邀我至田家
綠樹村邊合青山郭外斜
開軒面場圃把酒話桑麻
待到重陽日還來就菊花

題大禹寺義公禪房

義公習禪寂結宇依空林
戶外一峰秀階前眾壑深
夕陽連雨足空翠落庭陰
看取蓮花淨方知不染心

歲暮歸南山

北闕休上書南山歸敝廬
不才明主棄多病故人疏
白髮催

年老青陽逼歲除永懷愁不寐松月夜窗虛

舟中曉望

掛席東南望青山水國遙舳艫爭利涉來往接風潮問我今
何去天台訪石橋坐看霞色映疑是赤城標

途中遇晴

已失巴陵雨猶逢蜀阪泥天開斜景遍山出晚雲低餘濕猶
霑草殘流尚入溪今宵有明月鄉思遠淒淒

夜渡湘水

客舟貪利涉閭裡渡湘川露氣聞芳杜歌聲識采蓮榜人投
岸火漁子宿潭煙行侶時相問潯陽何處邊

赴京途中遇雪

迢遞秦京道蒼茫歲暮天窮陰連晦朔積雪滿山川落雁迷
沙渚飢鳥集野田客愁空伫立不見有人煙

途次望鄉

客行愁落日鄉思重相催況在他山外天寒夕鳥來雪深迷
郢路雨暗失陽臺可歎棲遲子狂歌誰爲媒

永嘉上浦館逢張八子容

逆旅相逢處江邨日暮時眾山遙對酒孤嶼共題詩
解宇鄰鮫室人煙接島夷鄉園萬餘里失路一相悲

宿武陽卽事

川暗夕陽盡孤舟泊岸初嶺猿相叫嘯潭嶂似空虛
就枕滅明燭扣舷聞夜漁雞鳴問何處人物是秦餘

闕題

劉脊虛

道由白雲盡春與青谿長時有落花至遠隨流水香閒門向山路深柳讀書堂幽映每白日清輝照衣裳

寄江滔求孟六遺文

南望襄陽路思君情轉親偏知漢水廣應與孟家鄰在日貪爲善昨來聞更貧相如有遺草一爲問家人

送李十一尉臨谿

常建

泠泠花下琴君唱渡江吟天際一帆影預懸離別心以言神仙尉兼致瑤華音回軫撫商調越谿澄碧林

泊舟盱眙

泊舟淮水次霜降夕流清夜久潮侵岸天寒月近城平沙依

雁宿候館聽雞鳴鄉國雲霄外誰堪羈旅情

宿王昌齡隱居

清谿深不測隱處惟孤雲松際露微月清光猶爲君茅亭宿
花影藥院滋苔紋余亦謝時去西山鸞鶴羣

潭州畱別

賢達不相識偶然交已深宿帆謁郡佐悵別依禪林湘水流
入海楚雲千里心望君杉松夜山月清猿吟

題破山寺後禪院

清晨入古寺初日照高林竹徑通幽處禪房花木深山光悅
鳥性潭影空人心萬籟此俱寂惟聞鐘磬音

望秦川

李頎

言雪山房詩卷十四
秦川朝望迥日出正東峰遠近山河淨透迤城闕重秋聲萬
戶竹寒色五陵松客有歸來歎淒其霜葉濃

送盧逸人

洛陽爲此別攜手更何時不復人間見祇應海上期清溪入
雲木白首臥茅茨共惜盧敖去天邊望所思

送人尉閩中

可歎芳菲日分爲萬里情閩門折垂柳御苑聽殘鶯海戍通
閩邑江帆過楚城客心君莫問春草是王程

送顧朝陽還吳

寂寞俱不偶裏糧空入秦宦途已可識歸臥包山春舊國指
飛鳥滄波愁旅人開樽洛水上怨別柳花新

寄鏡湖朱處士

澄霽晚波闊微風吹綠蘋
鱗鱗遠峰見淡淡平湖春
芳草自堪把白雲心所親
何時可爲樂夢裡東山人

駕幸河東

王昌齡

晉水千廬合汾橋萬國從
開唐天業盛入沛聖恩濃
下輦迴三象題碑任六龍
睿明懸日月千載此相逢

胡笳曲

城南虜已合一夜幾重圍
自有金笳引能霑出塞衣
聽臨關月苦清入海風微
三奏高樓曉胡人掩淚歸

客廣陵

樓頭廣陵近九月在南徐
秋色明海縣寒煙生里閭
夜帆歸

詩集山房唐詩卷十四
楚客昨日渡江書爲問易名叟垂綸不見魚

謁焦鍊師

中峰青苔壁一點雲生時豈意石堂裡得逢焦鍊師
爐香淨琴案松影閒瑤墀拜受長生藥翩翩西海期

宿京口期劉眷虛

霜天起長望殘月生海門風靜夜潮滿城高寒氣昏
故人何寂寞久已乖清言明發不能寐徒盈江上尊

登潤州城

邱爲

天末江城晚登臨客望迷春潮平島嶼殘雨隔虹蜺
鳥與孤帆遠煙和獨樹低鄉山何處是日斷廣陵西

除夜

一作史
青詩

王諲

今歲今宵盡明年明日催寒隨一夜去春逐五更來氣色空中改容顏暗裡回風光人不覺已著後園梅

十五夜觀燈

暫得金吾夜通看火樹春停車傍明月走馬入紅塵妓雜歌偏勝場移舞更新應須盡記取說向不來人

題靈隱寺山頂禪院

綦毋潛

招提此山頂下界不相聞塔影挂清漢鐘聲和白雲觀空靜室掩行道眾香焚且駐西來駕人天日未曛

宿龍興寺

香到夜忘歸松青古殿扉燈明方丈室珠繫比丘衣白月傳心淨青蓮喻法微天花落不盡處處鳥銜飛

張谷田家

儲光羲

縣官清且儉深谷有人家一徑入寒竹小橋穿野花
碓喧春澗滿梯倚綠桑斜自說年來稔前村酒可賒

詠山泉

山中有流水借問不知名映地爲天色飛空作雨聲
轉來深澗滿分出小池平恬淡無人見年年長自清

藍上茅茨期王維補闕

山中人
不見雲去夕陽過淺瀨寒魚少蘼蘭秋蝶多
老年疏世事幽性樂天和酒熟思才子谿頭望玉珂

旅次灞亭

沈頌

聞琴開旅思清夜有愁心圓月正當戶微風猶在林
蒼茫孤

亭上歷亂多秋音言念在明發東山幽意深

南溪別業

蔣冽

結宇依青嶂開軒對綠疇樹交花兩色溪合水同流竹徑春
來掃蘭樽夜不收逍遙自得意鼓腹醉中遊

明堂火珠

崔曙

正位開重屋凌空出火珠夜來雙月滿曙後一星孤天淨光
微滅煙生望若無遙知聖明代國寶在名都

途中曉發

晚霽長風裡勞歌赴遠期雲輕歸海疾月滿下山遲旅望山
高盡鄉心逐物悲故林遙不見況在落花時

緱山廟

言山房詩卷十四
遺廟肅陰陰孤峰映綠林步隨仙仗遠意入道門深澗水流
年月山雲變古今祇聞風竹裡猶有鳳笙音

送裴侍御歸上都

張謂

楚地勞行役秦城罷鼓鼙舟移洞庭岸路出武陵谿江月隨
人影山花趁馬蹄離魂將別夢先已到關西

過從弟制疑官舍竹齋

羨爾方爲吏衡門獨晏如野猿偷紙筆山鳥污圖書竹裡藏
公事花間隱使車不妨垂釣坐時贈小江魚

登金陵臨江驛樓

古戍依重險高樓見五梁山根盤驛道河水浸城牆庭樹巢
鸚鵡園花隱麝香忽然江浦上憶作捕魚郎

同王徵君湘中有懷

一作嚴維詩

八月洞庭秋瀟湘水北流還家萬里夢爲客五更愁不用開
書帙偏宜上酒樓故人京洛滿何日復同遊

江南弄

芮挺章

春江可憐事最在美人家鸚鵡能言鳥芙蓉巧笑花地銜金
作埒水抱玉爲沙薄晚青絲騎長鞭赴狹斜

讀雪山房唐詩卷十五 小傳二 目錄一 詩廿六

詩人小傳 十三

包何 字幼嗣潤州延陵人融之子與弟佶齊名世稱二

包登天寶進士第大厯中爲起居舍人今鈔五律

一首七律一首七絕一首

包佶 字幼正天寶六年及進士第累官諫議大夫坐善

元載貶嶺南劉晏奏起爲汴東兩稅使晏罷以佶

充諸道鹽鐵輕貨錢物使遷刑部侍郎改秘書監

封丹陽郡公今鈔五律一首七絕二首

張巡 蒲州河東人開元末舉進士第三以書判拔萃入

等天寶中爲真源令祿山之亂巡起兵討賊後至

睢陽與太守許遠嬰城固守經年乏食城陷死之
巡博通羣書爲文操紙筆立就有謝金吾表云想
峨眉之碧峰豫游西蜀追綠耳于懸圃保壽南山
臣被圍四十七日凡一千八百餘戰當臣効命之
時是賊滅亡之日文辭悲壯讀者哀之今鈔五律
一首五排一首

楊 賁 天寶三年登第詩一首

嚴 武 字季鷹華州人工部侍郎挺之之子以蔭調太原
府參軍累遷殿中侍御史從明皇入蜀擢諫議大
夫至德初房琯以其名臣子薦爲給事中厯劍南
節度使入爲太子賓客兼御史大夫改吏部侍郎

尋轉黃門侍郎再爲成都尹以破吐蕃功進檢校
吏部尙書封鄭國公最善杜甫其復鎮劍南甫往
依之今鈔五律一首七絕一首

讀雪山房唐詩卷十五

五律目錄二

岑參卅首 高適十三首 賈至一首

包何一首 包佶一首 張巡一首

楊賁一首 嚴武一首 李白四十三首

杜甫一百九首

詩經

卷之五

詩經

詩經

詩經

詩經

讀雪山房唐詩卷十五

五律二

寄左省杜拾遺

岑參

聯步趨丹陛分曹限紫薇曉隨天仗入暮惹御香歸白髮悲
花落青雲羨鳥飛聖朝無闕事自覺諫書稀

七月七日在內學見有道高舉徵宿關西客舍寄嚴許

二山人

雲送關西雨風傳渭北秋孤燈然客夢寒杵搗鄉愁灘上思
嚴子山中憶許由蒼生今有望飛詔下林邱

邱中春臥寄王子

田中開白屋林下閉元關卷迹人方處無心雲自閒竹深喧

暮鳥花缺露春山勝事那能說王孫去不還

酬崔十三侍御登玉壘山思故園見寄

玉壘天晴望諸峰盡覺低故園江樹北斜日嶺雲西曠野看
人小長空共鳥齊高山徒仰止不得日攀躋

南樓送衛憑

近縣多過客似君誠亦稀南樓取涼好便送故人歸鳥向望
中滅雨侵晴處飛應須乘月去且爲解征衣

磧西送李判官入京

一身從遠使萬里向安西漢月垂鄉淚胡沙費馬蹄尋河愁
地盡過磧覺天低送子軍中飲家書醉裡題

滻水東店送唐子歸嵩陽

野店臨官路重城壓御隄山開灞水北雨過杜陵西歸夢愁
能作鄉書醉嬾題橋回忽不見征馬尙聞嘶

送鄭堪歸東京汜水別業

客舍見青草忽聞思舊山看君霸陵去匹馬東皋還對酒風
與雪向家河復關因悲宦遊子終歲無時閑

送杜佐下第歸陸渾別業

正月今欲半陸渾花未開出關見青草春色正東來夫子且
歸去明時方愛才還須及秋賦莫卽隱蒿萊

送鄭少府赴滏陽

子真河朔尉邑里帶清漳春草迎袍色晴花拂綬香青山入
官舍黃鳥度官牆若到銅臺上應憐魏寢荒

言
還高冠潭口留別舍弟

昨日山有信祇今耕種時遙傳杜陵叟怪我還山遲獨向潭
上酌無人林下棊東谿憶汝處閒臥對鷓鴣

送張子尉南海

不擇南州尉高堂有老親樓臺重蜃氣邑里雜鯨人海暗三
山雨花明五嶺春此鄉多寶玉慎勿厭清貧

送陳子歸陸渾別業

雖不舊相識知君丞相家故園伊川上夜夢方山花種藥畏
春過出關愁路賒青門酒壚別日暮東城鴉

送顏少府投鄭陳州

一尉便垂白數年惟草立出關策匹馬逆旅聞秋蟬愛客多

酒債罷官無俸錢
知君羈思少所適
主人賢

趙少尹南亭送鄭侍御歸東臺

紅亭酒甕香白面
繡衣郎砌冷蟲喧
座簾疏月到床鐘
催離興急絃逐醉
歌長關樹應先落
隨君滿路霜

送秘省虞校書赴虞鄉丞

花綬傍腰新關東
縣欲春殘書厭蚪
蚪舊閣別麒麟虞
阪臨官舍條山映
吏人看君有知己
坦腹向平津

奉送李太保兼御史大夫充渭北節度使

詔出未央宮登壇
近總戎上公周太
保副相漢司空弓
抱關西月旗翻渭
北風弟兄皆許國
天地荷成功

虢州送天平何丞入京市馬

關樹晚蒼蒼長安近夕陽回風醒別酒細雨濕行裝習戰邊
城黑防秋塞草黃知君市駿馬不是學燕王

陝州月城樓送辛判官入奏

送客飛鳥外城頭樓最高尊前遇風雨窗裡動波濤謁帝向
金殿隨身惟寶刀相思霸陵月祇有夢魂勞

送揚子

斗酒渭城邊壚頭耐醉眠梨花千樹雪楊葉萬條煙惜別添
壺酒臨期贈馬鞭看君潁上去秋月到家圓

發臨洮將赴北庭畱別

聞說輪臺路連年見雪飛春風曾不到漢使亦應稀白草通
疏勒青山過武威勤王敢道遠私向夢中歸

與鄠縣源少府泛漢陂

載酒入天色水涼難醉人清搖縣郭動碧洗雲山新吹笛驚
白鷺垂竿釣紫鱗憐君公事後陂上日娛賓

登總持閣

高閣逼諸天登臨近日邊晴開萬井樹愁看五陵煙檻外低
秦嶺窗中小渭川早知清淨裡常願奉金仙

省中卽事

華省謬爲郎蹉跎鬢已霜到來恆樸被隨例且含香竹影遮
窗暗花陰拂簟涼君王新賜筆草奏向明光

高冠谷口贈鄭鄠

谷口來相訪空齋不見君澗花然暮雨潭樹暖春雲門徑希

言雪山房詩卷三
四
人迹簷峰下鹿羣衣裳與枕席山靄碧氛氲

題山寺僧房

窗影搖羣動牆陰載一峰野爐風自爇山碓水能舂勸學翻知誤爲官好欲慵高僧暝不見月出但聞鐘

初授官題高冠草堂

三十始一命宦情多欲闌自憐無舊業不敢恥微官澗水吞樵路山花醉藥欄祇緣五斗米辜負一漁竿

北庭作

雁塞通鹽澤龍堆接醋溝孤城天北畔絕域海西頭秋雪春仍下朝風夜不休可知年四十猶自未封侯

巴南舟中夜書事

渡口欲黃昏歸人爭渡喧近鐘清野寺遠火點江村見雁思
鄉信聞猿積淚痕孤舟萬里外秋月不堪論

初至犍爲作

山色軒楹內灘聲枕席間草生公府靜花落訟庭閒雲雨連
三峽風塵接百蠻到來能幾日不覺鬢毛斑

部落曲

高適

蕃軍傍塞遊代馬噴風秋老將垂金甲閱支着錦裘琱戈蒙
豹尾紅旆插狼頭日暮天山下鳴笳漢使愁

醉後贈張九旭

世上漫相識此翁殊不然興來書自聖醉後語尤顛白髮老
閒事青雲在目前牀頭一杯酒能更幾回眠

途中寄徐錄事

落日風雨至秋天鴻雁初離憂不堪比旅館復何如君又幾時去我知音信疏空多篋中贈長見右軍書

送白少府送兵之隴右

殘更登隴首遠別指臨洮爲問關山事何如州縣勞軍容隨赤羽樹色引青袍誰斷單于臂今年太白高

別從甥萬盈

諸生曰萬盈四十乃知名宅相予偏重家邱人莫輕美才應自料苦節豈無成莫以山田薄今春又不耕

送馮判官

碣石遼西地漁陽薊北天關山惟一道雨雪盡三邊才子方

爲客將軍正渴賢遙知幕府下書記日翩翩

送劉評事充朔方判官賦得征馬嘶

征馬向邊州蕭蕭嘶不休思深應帶別聲斷爲兼秋岐路風
將遠關山月正愁贈君從此去何日大刀頭

別王八

征馬嘶長路離人把佩刀客來東道遠歸去北風高時候何
蕭索鄉心正鬱陶傳君遇知己行日有綈袍

送韓九

惆悵別離日幾回岐路前歸人望獨樹匹馬隨秋蟬常與天
下士許君兄弟賢良時正可用行矣莫徒然

送鄭侍御謫閩中

謫去君無恨閩中我舊過大都秋雁少只是夜猿多東路雲
山合南天瘴癘和自當逢雨露行矣慎風波

送李侍御赴安西

行子對飛蓬金鞭指鐵驄功名萬里外心事一杯中虜障燕
支北秦城太白東離魂莫惆悵看取寶刀雄

送青夷軍入居庸

三首之一

匹馬行將久征鴻去轉難不知邊地別祇訝客衣單谿冷泉
聲苦山空木葉乾莫言關塞極雨雪尙漫漫

薊門作

驅馬薊門北北風邊馬哀蒼茫遠山口豁達胡天開五將已
深入前軍止半回誰憐不得意長劒獨歸來

岳陽樓宴王員外貶長沙

賈至

極浦三春草高樓萬里心
楚山晴靄碧湘水暮流深
忽與朝中舊同爲澤畔吟
停杯試北望還欲淚沾巾

婺州別鄧使君

包何

西掖馳名久東陽出守時
江山婺女分風月隱候詩
別恨雙溪急畱歡五馬遲
迴舟映沙嶼未遠剩相思

秋日過徐氏園林

包佶

回塘分越水古樹積吳煙
掃竹催鋪席垂蘿待繫船
鳥窺新罅栗龜上半欹蓮
屢入忘歸地長嗟俗事牽

聞笛

張巡

岑堯試一臨虜騎附城陰
不辨風塵色安知天地心
營開邊

月近戰苦陣雲深旦夕高樓上遙聞橫笛音

時興

楊 賁

貴人昔未貴咸願顧寒微及自登樞要何曾問布衣
平明趨紫闕日宴下彤闈擾擾路傍子無勞歌是非

班婕妤

嚴 武

賤妾如桃李君王若歲時秋風一已勁搖落不勝悲
寂寂蒼苔滿沈沈綠草滋繁華非此日指輦競何辭

塞下曲

六首
之三

李 白

五月天山北無花祇有寒笛中間聞折柳春色未曾看
曉戰隨金鼓宵眠抱玉鞍願將腰下劍直爲斬樓蘭

駿馬似風飆鳴鞭出渭橋彎弓辭漢月插羽破天驕
陣外星

芒盡營空海霧消功成畫麟閣獨有霍嫖姚
寒虜乘秋下天兵出漢家將軍分虎竹戰士臥龍沙邊月隨
弓影胡霜拂劒花玉關殊未入少婦莫長嗟

宮中行樂詞八首

小小金生屋盈盈在紫微山花插寶髻石竹繡羅衣每出深
宮裡常隨步輦歸只愁歌舞散化作綵雲飛

柳色黃金嫩梨花白雪香玉樓巢翡翠金殿鎖鴛鴦選妓隨
雕輦徵歌出洞房宮中誰第一飛燕在昭陽
盧橘爲秦樹葡萄出漢宮煙花宜落日絲管醉春風笛奏龍
吟水簫鳴鳳下空君王多樂事還與萬方同

玉樹春歸日金宮樂事多後庭朝未入輕輦夜相過笑出花

間語嬌來竹下歌莫教明月去畱着醉嫦娥

繡戶香風暖紗窗曙色新宮花爭笑日池草暗生春綠樹聞
歌鳥青樓見舞人昭陽桃李月羅綺自相親

今日明光裡還須結伴遊春風開紫殿天樂下珠樓豔舞全
知巧嬌歌半欲羞更憐花月夜宮女笑藏鉤

寒雪梅中盡春風柳上歸宮鶯嬌欲醉簷燕語還飛遲日明
歌席新花豔舞衣晚來移綵仗行樂泥光輝

水綠南薰殿花紅北闕樓鶯歌聞太液鳳吹繞瀛洲素女鳴
珠佩天人弄綵球今朝風日好宜入未央游

秋思

燕支黃葉落妾望自登臺海上碧雲斷單于秋色來胡兵沙

塞合漢使玉關回征客無歸日空悲蕙草摧

贈孟浩然

吾愛孟夫子風流天下聞紅顏棄軒冕白首臥松雲醉月頻
中聖迷花不事君高山安可仰徒此揖清芬

沙邱城下寄杜甫

我來竟何事高臥沙邱城城邊有古樹日夕連秋聲魯酒不
可醉齊歌空復情思君若汶水浩蕩寄南征

送趙雲卿

白玉一杯酒綠楊三月時春風餘幾日兩鬢各成絲秉燭唯
憐飲投竿也未遲如逢渭川獵猶可帝王師

廣陵贈別

玉甌沽美酒數里送君還繫馬垂楊下銜杯大道問天邊看
涿水海上見青山興罷各分袂何須醉別顏

口號贈楊徵君鴻

陶令辭彭澤梁鴻入會稽我尋高士傳君與古人齊雲臥畱
丹壑天書降紫泥不知楊伯起早晚向關西

贈崔秋浦

三首之一

吾愛崔秋浦宛然陶令風門前五楊柳井上二梧桐山鳥下
廳事簷花落酒中懷君未忍去惆悵意無窮

別儲邕之剡中

借問剡中道東南指越鄉舟從廣陵去水入會稽長竹色溪
下綠荷花鏡裡香辭君向天姥拂石臥秋霜

畱別龔處士

龔子棲閑地都無人世喧
柳深陶令宅竹暗辟疆園
我去黃牛峽愁聞白帝猿
贈君卷菴草心斷竟何言

渡荆門送別

遠渡荆門外來從楚國游
山隨平野盡江入大荒流
月下飛天鏡雲生結海樓
仍憐故鄉水萬里送行舟

江夏別宋之悌

楚水清若空遙將碧海通
人分千里外興在一杯中
谷鳥吟晴日江猿嘯晚風
平生不下淚於此泣無窮

南陽送客

斗酒勿爲薄寸心貴不忘
坐惜故人去偏令游子傷
離筵怨

芳草春思結垂楊揮手再三別臨岐空斷腸

送張舍人之江東

張翰江東去正值秋風時天清一雁過海闊孤帆遲白日行
欲暮滄波杳何期吳洲如見月千里幸相思

魯郡東石門送杜二甫

醉別復幾日登臨徧池臺何時石門路重有金樽開秋波落
泗水海色明徂徠飛蓬各自遠且盡手中杯

送殷淑

三首之一

白鷺洲前月天明送客迴青龍山後日早出海雲來流水無
情去征帆逐吹開相看不忍別更進手中杯

送友人

青山橫北郭白水繞東城此地一爲別孤蓬萬里征浮雲遊
子意落日故人情揮手自茲去蕭蕭班馬鳴

送友人入蜀

見說蠶叢路崎嶇不易行山從人面起雲傍馬頭生芳樹籠
秦棧春流遶蜀城升沈應已定不必問君平

侍從游宿溫泉宮作

羽林十二將羅列應星文霜仗懸秋月霓旌卷夜雲嚴更千
戶肅清樂九天聞日出瞻佳氣葱葱繞聖君

京兆常參軍量移東陽

聞說金華渡東連五百灘全勝若耶好莫道此行難猿嘯千
溪合松風五月寒他年一攜手搖艇入新安

秋登宣城謝眺城樓

江城如畫裡山曉望晴空
兩水夾明鏡雙橋落彩虹
人煙寒橘柚秋色老梧桐
誰念北樓上臨風憶謝公

過崔八丈水亭

高閣橫秀氣清幽併在君
簷飛宛溪水窗落敬亭雲
猿嘯風中斷漁歌月裡聞
閑隨白鷗去沙上自爲羣

太原早秋

歲落眾芳歇時當大火流
霜威出塞早雲色渡河秋
夢遶邊城月心飛故國樓
思君若汾水無日不悠悠

金陵

三首之二

地擁金陵勢城迴江水流
當時百萬戶夾道起朱樓
故國生

春草王宮沒古邱空餘後湖月波上對江州
六代興亡國三杯爲爾歌苑方秦地少山似洛陽多古殿吳
花草深宮晉綺羅併隨人事滅東逝與滄波

陪宋中丞武昌夜飲懷古

清景南樓夜風流在武昌庾公愛秋月乘興坐胡床龍笛迎
寒水天河落曉霜我心還不淺懷古醉餘觴

宿巫山下

昨夜巫山下猿聲夢裡長桃花飛淥水三月下瞿塘雨色風
吹去南行拂楚王高邱懷宋玉訪古一霑裳

謝公亭

謝公離別處風景每生愁客散青天月山空碧水流池花春

言言山房詩卷三
三
映日窗竹夜鳴秋今古一相接長歌懷舊游

夜宿牛渚懷古

牛渚西江夜青天無片雲登舟望秋月空憶謝將軍余亦能
高詠斯人不可聞明朝挂帆去楓葉落紛紛

尋雍尊師隱居

羣峭碧摩天逍遙不記年撥雲尋古道倚石聽流泉花暖青
牛臥松高白鶴眠語來江色暮獨自下寒煙

訪戴天山道士不遇

犬吠水聲中桃花帶雨濃樹深時見鹿溪午不聞鐘野竹分
青靄飛泉挂碧峰無人知所處愁倚兩三松

聽蜀僧濬彈琴

蜀僧抱綠綺西下峨眉峰爲我一揮手如聽萬壑松客心洗
流水餘響入霜鐘不覺碧山暮秋雲暗幾重

觀胡人吹笛

胡人吹玉笛一半是秦聲十月吳山曉梅花落敬亭愁聞出
塞曲淚滿逐臣纓卻望長安道空懷戀主情

房兵曹胡馬

杜甫

胡馬大宛名鋒稜瘦骨成竹批雙耳峻風入四蹄輕所向無
空闊真堪托死生驍騰有如此萬里可橫行

夜宴左氏莊

風林纖月落衣露淨琴張暗水流花徑春星帶草堂檢書燒
燭短看劍引杯長詩罷聞吳詠扁舟意不忘

春日懷李白

白也詩無敵飄然思不羣
清新庾開府俊逸鮑參軍
渭北春
天樹江東日暮雲
何時一尊酒重與細論文

贈陳二補闕

世儒多汨沒夫子獨聲名
獻納開東觀君王問長卿
皂雕寒
始急天馬老能行
自到青冥裡休看白髮生

送高三十五書記

歎惜高生老新詩日又多
美名人不及佳句法如何
主將收
才子崆峒足凱歌
聞君已朱紱且得慰蹉跎

杜位宅守歲

守歲阿戎家椒盤已頌花
盞簪喧欂馬列炬散林鴉
四十明

朝過飛騰暮景斜誰能更拘束爛醉是生涯

送裴二虬作尉永嘉

孤嶼亭何處天涯水氣中故人官就此絕境與誰同
隱吏逢梅福游山憶謝公扁舟吾已具把釣待秋風

送張十二參軍赴蜀因呈楊五侍御

好去張公子通家別恨添兩行秦樹直萬點蜀山尖
御史新驄馬參軍舊紫髯皇華吾善處于汝定無嫌

畫鷹

素練風霜起蒼鷹畫作殊搜身思狡兔側目似愁胡
絛鍔光堪摘軒楹勢可呼何當擊凡鳥毛血灑平蕪

陪鄭廣文遊何將軍山林十首

言
不識南塘路今知第五橋名園依綠水野竹上青霄谷口舊
相得濠梁同見招平生爲幽興未惜馬蹄遙

百頃風潭上千章夏木清卑枝低結子接葉暗巢鶯鮮鯽銀
絲鱠香芹碧澗羹翻疑柁樓底晚飯越中行

萬里戎王子何年別月支異花開絕域滋蔓匝清池漢使徒
空到神農竟不知露翻兼雨打開坼日離披

旁舍連高竹疏籬帶晚花碾渦深沒馬籐蔓曲藏蛇詞賦工
何益山林迹未賒盡捻書籍買來問爾東家

賸水滄江破殘山碣石開綠垂風折笋紅綻雨肥梅銀甲彈
箏用金魚換酒來興移無灑掃隨意坐莓苔

風磴吹陰雪雲門吼瀑泉酒醒思臥簟衣冷欲裝棉野老來

看客河魚不取錢祇疑涸樸處自有一山川
棘樹寒雲色茵陳春藕香脆添生菜美陰益食單涼野鶴清
晨出山精白日藏石林蟠水府百里獨蒼蒼

憶過楊柳渚走馬定昆池醉把青荷葉狂遺白接離刺船思
郢客解水乞吳兒坐對秦山晚江湖興頗隨

牀上書連屋階前樹拂雲將軍不好武穉子總能文醒酒微
風入聽詩靜夜分絺衣挂蘿薜涼月白紛紛

幽意忽不愜歸期無奈何出門流水注回首白雲多自笑燈
前舞誰憐醉後歌祇應與朋好風雨亦來過

重過何氏五首

問訊東橋竹將軍有報書倒衣還命駕高枕乃吾廬花妥鶯

言山房詩卷十五
三
捎蝶溪喧獺趣魚重來休沐地真作野人居

山雨尊仍在沙沈榻未移犬迎曾宿客鷗護落巢兒雲薄翠
微寺天清黃子陂向來幽興極步履過東籬

落日平臺上春風啜茗時石欄斜點筆桐葉坐題詩翡翠鳴
衣桁蜻蜓立釣絲自今幽興熟來往亦無期

頗怪朝參懶應耽野趣長雨拋金鎖甲苔臥綠沈槍手自移
蒲柳家纔足稻梁看君用幽意白日到羲皇

到此應常宿相畱可判年蹉跎暮容色悵望好林泉何日霑
微祿歸山買薄田斯遊恐不遂把酒意茫然

故衛武將軍挽詞

嚴警當寒夜前軍落大星壯夫思敢決哀詔惜精靈王者今

無戰書生已勒銘封侯意疏闊編簡爲誰青

月夜

今夜鄜州月閨中只獨看遙憐小兒女未解憶長安香霧雲
鬟濕清輝玉臂寒何時倚虛幌雙照淚痕乾

對雪

戰哭多新鬼愁吟獨老翁亂雲低薄暮急雪舞迴風瓢棄尊
無緣爐存火似紅數州消息斷愁坐正書空

得舍弟消息二首

近有平陰信遙憐舍弟存側身千里道寄食一家村烽舉新
酣戰啼垂舊血痕不知臨老日招得幾人魂

汝懦歸無計吾衰往未期浪傳烏鵲喜深負鵲鵲詩生理何

言集上房詩卷三
二
顏面端憂且歲時兩京三十口雖在命如絲

春望

國破山河在城春草木深感時花濺淚恨別鳥驚心烽火連
三月家書抵萬金白頭搔更短渾欲不勝簪

喜達行在所三首

西憶岐陽信無人遂卻回眼穿當落日心死着寒灰霧樹行
相引連山望忽開所親驚老瘦辛苦賊中來

愁思胡笳夕淒涼漢苑春生還今日事問道暫時人司隸章
初睹南陽氣已新喜心翻倒極嗚咽淚沾巾

死去憑誰報歸來始自憐猶瞻太白雪喜遇武功天影靜千
官裡心蘇七校前今朝漢社稷新數中興年

月

天上秋期近人間月影清
入河蟾不沒搗藥兔長生
只益丹心苦能添白髮明
干戈知滿地休照國西營

晚行口號

三川不可到歸路晚山稠
落雁浮寒水饑鳥集成樓
市朝今日異喪亂幾時休
遠媿梁江總還家尙黑頭

收京

三首之二

生意甘衰白天涯正寂寥
忽聞哀痛詔又下聖明朝
羽翼懷商老文思憶帝堯
叨逢罪己日霑灑望青霄

汗馬收宮闕春城鏟賊壕
賞應歌杕杜歸及薦櫻桃
雜虜橫戈數功臣甲第高
萬方頻送喜無乃聖躬勞

奉贈王中允維

中允聲名久如今契闊深共傳收庾信不比得陳琳一病緣
明主三年獨此心窮愁應有作試誦白頭吟

春宿左省

花隱掖垣暮啾啾棲鳥過星臨萬戶動月傍九霄多不寢聽
金鑰因風想玉珂明朝有封事數問夜如何

晚出左掖

晝刻傳呼淺春旗簇仗齊退朝花底散歸院柳邊迷樓雪融
城濕宮雲去殿低避人焚諫草騎馬欲雞棲

送賈閣老出汝州

西掖梧桐樹空畱一院陰艱難歸故里去住損春心宮殿青

門隔雲山紫邏深人生五馬貴莫受二毛侵

送翰林張司馬南海勒碑

冠冕通南極文章落上台詔從三殿去碑到百蠻開野館濃
花發春帆細雨來不知滄海使天遣幾時迴

端午日賜衣

宮衣亦有名端午被恩榮細葛含風軟香羅疊雪輕自天題
處濕當暑著來清意內稱長短終身荷聖情

贈高式顏

昔別是何處相逢皆老夫故人還寂寞削迹共艱虞自失論
文友空知賣酒壚平生飛動意見爾不能無

至德二載甫自京金光門出間道歸鳳翔乾元初從左

拾遺移華州掾與親故別因出此門有悲往事

此道昔歸順西郊胡正煩至今猶破膽應有未招魂近侍歸
京邑移官豈至尊無才日衰老駐馬望千門

路逢襄陽楊少府入城戲呈楊員外綰

寄語楊員外山寒少茯苓歸來稍暄暖當爲劇青冥翻動神
仙窟封題鳥獸形兼將老籐杖扶汝醉初醒

秦州雜詩

滿目悲生事因人作遠遊遲迴度隴怯浩蕩及關愁水落魚
龍夜山空鳥鼠秋西征問烽火心折此淹留

秦州城北寺勝跡隗宮苔蘚山門古丹青野殿空月明垂
葉露雲逐度溪風清渭無情極愁時獨向東

鼓角緣邊郡川原欲夜時秋聽殷地發風散入雲悲抱葉寒
蟬靜歸山獨鳥遲萬方聲一概吾道欲何之

南使宜天馬由來萬匹強浮雲連陣沒秋草徧山長聞說真
龍種仍殘老驕驕哀鳴思戰鬪迴立向蒼蒼

城上胡笳奏山邊漢節歸防河赴滄海奉詔發金微士苦形
骸黑林疏鳥獸稀邨堪往來戍恨解鄴城圍

莽莽萬重山孤城石谷間無風雲出塞不夜月臨關屬國歸
何晚樓蘭斬未還煙塵一長望衰颯正摧顏

聞道尋源使從天此路迴牽牛去幾許宛馬至今來一望幽
燕隔何時郡國開東征健兒盡羌笛暮吹哀

今日明人眼臨池好驛亭叢篁低地碧高柳半天青稠疊多

讀書山房唐詩卷三
幽事喧呼閱使星老夫如有此不異在郊垌

雲氣接崑崙涔涔塞雨繁羌童看渭水使客向河源煙火軍
中幕牛羊嶺上村所居秋草靜正閉小蓬門

蕭蕭古塞冷漠漠秋雲低黃鵠翅垂雨蒼鷹饑啄泥薊門誰
自北漢將獨征西不意書生耳臨衰厭鼓鼙

山頭南郭寺水號北流泉老樹空庭得清渠一邑傳秋花危
石底晚景臥鐘邊俛仰悲身世溪風爲颯然

傳道東柯谷深藏數十家對門簾蓋瓦映竹水穿沙瘦地翻
宜栗陽坡可種瓜船人近相報但恐失桃花

萬古仇池穴潛通小有天神魚今不見福地語眞傳近接西
南境長還十九泉何當一茅屋送老白雲邊

東柯好崖谷不與眾峰羣落日邀雙鳥晴天養片雲野人矜
險絕水竹會平分採藥吾將老兒童未遣聞

邊秋陰易夕不復辨晨光簷雨亂淋幔山雲低度牆鷓鴣窺
淺井蚯蚓上深堂車馬何蕭索門前百草長

地僻秋將盡山高客未歸塞雲多斷續邊日少光輝警急烽
常報傳聞檄屢飛西戎外甥國何得迂天威

鳳林戈未息魚海路常難候火雲峰峻懸軍幕井乾風連西
極動月過北庭寒故老思飛將何時議築壇

唐堯真自聖野老復何知曬藥能無婦應門亦有兒藏書聞
禹穴讀記憶仇池爲報鴈行舊鷓鴣在一枝

送人從軍

詩集卷之三
三
弱水應無地陽關已近天
今君度砂磧累月斷人煙
好武甯論命封侯不計年
馬寒防失道雪沒錦鞍韉

東樓

萬里流沙道西行過此門
但添新戰骨不返舊征魂
樓角凌風迴城陰帶水昏
傳聲看驛使送節向河源

遣懷

愁眼看霜露寒城菊自花
天風隨斷柳客淚墮清笳
水靜樓陰直山昏塞日斜
夜來歸鳥盡啼殺後棲鴉

寓目

一縣葡萄熟秋山苜蓿多
關雲常帶雨塞水不成河
羌女輕烽燧胡兒掣駱駝
自傷遲暮眼喪亂飽經過

山寺

野寺殘僧少山園細路高麝香眠石竹鸚鵡啄金桃亂水通
人過懸崖置屋牢上方重閣晚百里見秋毫

擣衣

亦知戍不返秋至拭清砧已近苦寒月況經長別心甯辭搗
衣倦一寄塞垣深用盡閨中力君聽空外音

促織

促織甚微細哀音何動人草根吟不穩牀下意相親久客得
無淚故妻難及晨悲絲與急管感激異天真

夕烽

夕烽來不近每日報平安塞上傳光小雲邊落點殘照秦通

詩集卷五
警急過隴自艱難聞道蓬萊殿千門立馬看

病馬

乘爾亦已久天寒關塞深塵中老盡力歲晚病傷心毛骨豈殊眾馴良猶至今物微意不淺感動一沈吟

蕃劍

致此自僻遠又非殊玉裝如何有奇怪每夜吐光芒虎氣必騰上龍身甯久藏風塵苦未息持汝奉明王

遠遊

賤子何人記迷方着處家竹風連野色江水擁春沙種藥扶衰病吟詩解歎嗟似聞胡騎走失喜問京華

官定後戲贈

不作河西尉淒涼爲折腰老夫怕趨走率府且逍遙耽酒須
微祿狂歌托聖朝故山歸興盡回首向風飆

月夜憶舍弟

戍鼓斷人行邊秋一雁聲露從今夜白月自故鄉明有弟皆
分散無家問死生寄書長不達況乃未休兵

天末懷李白

涼風起天末君子意如何鴻雁幾時到江湖秋水多文章憎
命達魑魅喜人過應共冤魂語投詩贈汨羅

送遠

帶甲滿天地胡爲君遠行親朋盡一哭鞍馬去孤城草木歲
月晚關河霜雪清別離已昨日因見古人情

詩集卷十五
奉簡高三十五使君

當代論才子如公復幾人
驂騑開道路鷹隼出風塵
行色秋將晚交情老更親
天涯喜相見披豁對吾真

奉酬李都督表丈早春作

力疾坐清曉來詩悲早春
轉添愁伴客更覺老隨人
紅入桃花嫩青歸柳葉新
望鄉應未已四海尙風塵

遣興

干戈猶未定弟妹各何之
拭淚霑襟血梳頭滿面絲
地卑荒野大天遠暮江遲
衰疾那能久應無見汝期

出郭

霜露晚淒淒高天逐望低
遠煙鹽井上斜景雪峰西
故國猶

兵馬他鄉亦鼓鼙江城今夜客還與舊鳥啼

寄楊五桂州譚

五嶺皆炎熱宜人獨桂林梅花萬里外雪片一冬深聞此寬
相憶爲邦復好音江邊送孫楚遠附白頭吟

和裴迪登新津寺寄王侍郎

何限倚山木吟詩秋葉黃蟬聲集古寺鳥影度寒塘風物悲
遊子登臨憶侍郎老夫貪佛日隨意宿僧房

散愁二首

久客宜旌旆興王未息戈蜀星陰見少江雨夜聞多百萬傳
深入寰區望匪他司徒下燕趙收取舊山河

聞道并州鎮尙書訓士齊幾時通薊北當日報關西戀闕丹

言
心破霑衣皓首啼老魂招不得歸路恐長迷

漫成

江皋已仲春花下復清晨仰面貪看鳥回頭錯應人讀書難
字過對酒滿壺傾近識峨眉老知余嬾是真

春夜喜雨

好雨知時節當春乃發生隨風潛入夜潤物細無聲野徑雲
俱黑江船火獨明曉看紅濕處花重錦官城

江亭

坦腹江亭臥長吟野望時水流心不競雲在意俱遲寂寂春
將晚欣欣物自私江東猶苦戰回首一顰眉

後遊

寺憶曾游處橋憐再渡時江山如有待花柳更無私野潤煙
光薄沙暄日色遲客愁全爲減捨此復何之

贈別何邕

生死論交地何由見一人悲君隨燕雀薄宦走風塵
通漢沱江不向秦五陵花滿眼傳語故鄉春

不見

不見李生久佯狂真可哀世人皆欲殺吾意獨憐才
敏捷詩千首飄零酒一杯匡山讀書處頭白好歸來

贈別鄭鍊赴襄陽

戎馬交馳際柴門老病身把君詩過日念此別驚神
地闊峨眉晚天高峴首春爲於耆舊內試覓姓龐人

詩雪山房唐詩卷十五
送段功曹歸廣州

南海春天外功曹幾月程
峽雲籠樹小湖日蕩船明
交趾丹砂重韶州白葛輕
幸君因旅客時寄錦官城

題元武禪師屋壁

何年顧虎頭滿壁畫滄洲
赤日石林氣青天江海流
錫飛常近鶴杯渡不驚鷗
似得廬山路真隨惠遠遊

客亭

秋窗猶曙色木落更天風
日出寒山外江流宿霧中
聖朝無棄物老病已成翁
多少殘生事飄零似轉蓬

客夜

客睡何曾着秋天不肯明
捲簾殘月影高枕遠江聲
計拙無

衣食途窮仗友生老妻書數紙應悉未歸情

悲秋

涼風動萬里羣盜尙縱橫家遠傳書日秋來爲客情愁窺高
鳥過老逐眾人行始欲投三峽何由見兩京

春日梓州登樓

行路難如此登樓望欲迷身無卻少壯跡有但羈棲江水流
城郭春風入鼓輦雙雙新燕子依舊已銜泥

天畔登樓眼隨春入故園戰場今始定移柳更能存厭蜀交
遊冷思吳勝事繁應須理舟楫長嘯下荆門

上甌率寺

甌率知名寺真如會法堂江山有巴蜀棟宇自齊梁庾信哀

雖久周顒好不忘白牛車遠近且欲上慈航

有感五首

將帥蒙恩澤兵戈有歲年至今勞聖主何以報皇天白骨新
交戰雲臺舊拓邊乘槎斷消息無處問張騫
幽薊餘虵豕乾坤尙虎狼諸侯春不貢使者日相望慎勿吞
青海無勞問越裳大君先息戰歸馬華山陽
洛下舟車入天中貢賦均日間紅粟腐寒待翠華春莫取金
湯固長令宇宙新不過行儉德盜賊本王臣
丹桂風霜急青梧日夜凋由來強幹地未有不臣朝受鉞親
賢往卑宮制詔遙終依古封建豈獨聽簫韶
盜滅人還亂兵殘將自疑登壇名絕假執玉爾何遲領郡輒

無邑之官皆有詞願聞哀痛詔端拱問瘡痍

戲題寄上漢中王

羣盜無歸路衰顏會遠方
尙憐詩警策猶記酒顛狂
魯衛彌尊重徐陳略喪亡
空餘枚叟在應念早升堂

送元二適江左

亂後今相見秋聲復遠行
風塵爲客日江海送君情
晉室丹陽尹公孫白帝城
經過自愛惜取次莫論兵

賦詩敬其問津

